

KOLOSI

Pepa Paulo ingere panzi kalo-tawana tamâta simo Kolosi lawea

Paulo imo luma sakamao ilo nana ne wurâta nana itula pâri ara kâ, ande ingere ngua nîne ilâ panzi kalo-tawana tamâta simo Kolosi lawea lâ Esia tâno. Paulo muŋga imo Kolosi lawea tia, andeta iloŋo ngua tu ilo-kalo soki-soki nde iyaula kinzi kalo-tawana tamâta ilonzi kalonzi. Pananâŋa tamâta laŋeŋa pinde sipanananzi tu Kirisi nde Maro Kindeni Natu tia, kala imo rege-rege kunzi aŋelo nâ. Aku situla tukuŋa kaa kaa pinde panzi tona. Andeta lâ pepa nîne Paulo ileleanzi iporo kaika tu Yesu nde rege-rege kuku Maro Kindeni tamwata, kala i ne kaika nde nŋalae ninde. Aku itula vetâŋa arara pinde panzi tona nana ma sipaveta kuku.

Kinzi tamâta lâ Kolosi lawea kalonzi tawana Yesu mao nâ

1 ¹Naŋa Paulo, naŋa amo Yesu Kirisi ne pâri-tamâta ikura Maro Kindeni tamwata ne pateâŋa mine. Naŋa amo taitu kuku ninda-nambwe Timoti, ²kala aŋgere ngua lâ pepa nîne tini imâ pa miki Maro Kindeni ne nŋu kamo Kolosi lawea, miki ninde kapaipa kuku Yesu Kirisi lâ kala kalomi tawana i mao nâ. Kinda Tamânda Maro Kindeni ne wisi-wisi wa wisi-pisi wa imo kumi.

³Lâ zo ndia maka kakai noŋa pa nenda Maro Yesu Kirisi Tama Maro Kindeni, ande maka uru kaloma ngere nana miki kâ, aku lâ zo ninde rârâni maka kawama ndaŋge ilâ papa i. ⁴Nana tu maka kaloŋo miki parinami tu nemi kalo-tawana ikeno kaika ndo pa Yesu Kirisi, aku miki uru tinimi mwasa ndo panzi Maro Kindeni ne tamâta rârâni. ⁵Muŋga, lâ zo ninde pâri ara ne ngua mao ipâŋga wasaseki pami, ande miki kaloŋo ngua nana vetâŋa arara ninde ma muli imâ ipâŋga pami. Maro Kindeni uru ikatona vetâŋa arara ninde pami lâ samba lawea. Kala nîne

miki uru kao tinimi nâ ñana vetâña arara ñinde kâ, aku ñine igagati ilomi kalomi ñana kalomi tawana Yesu Kirisi ku kao ilomi ndo ilâ panzi Maro Kindeni ne tamâta. ⁶Nanayoni, miki kaloño pâri ara ñana Maro Kindeni ne wisi-wisi kâ, kala kasama wisi-wisi ñinde kilala sondo lâ. Lâ zo muñgâña ñinde, aku imâ lee ipâñga lâ zo ñine, ande pâri ara ñinde uru ipula kanaño ara ndo lâ ilomi kalomi. Aku pâri ara ndainani nâ isala nia ikura tâno pinde kala ipula kanaño ipâñga mine nâ lâ tamâta rârâ ilonzi kalonzi tona. ⁷Epafras muñga itula pâri ara ñinde pami, kala miki kasama lâ. Epafras nde Kirisi ne wurâta tamâta itogo maka mine, aku maka tinima mwasa ndo papa i. I uru ikai maka niama ñana ivila miki sondo kâ. ⁸Itapâri pama tu Koroani Sapâña igagatimi ñana kao ilomi ndo ilâ panzi Maro Kindeni ne tamâta.

**Paulo ikai noña pa Maro Kindeni tu i ma ipu tini kaika
panzi kalo-tawana tamâta simo Kolosi lawea**

⁹Mine kala muñga, lâ zo ñinde maka kaloño miki parinami mine, aku imâ lee ipâñga lâ zo ñine, ande ikura zo zo maka kakai noña pa Maro Kindeni tu ma isukami ku io Koroani Sapâña imâ pami tu ipananami sondo ñana vetâña ndia Maro Kindeni ilo papa ñinde, ñana miki ma kakai ilo-kalo ku kasama ñinde sondo. ¹⁰Maka nema noña ñinde nde duvi mine; maka iloma tu miki ma kamo sondo, ikura Maro Ñjalae ipatea pami mine. Ambo miki ma kamo mine, ande i ma ilo ara ñana nemi vetâña rârâni kâ. Maka iloma tu miki ma kaveta vetâña arara kie-kie, itogo kâi ipula kanaño mine. Aku iloma tu nemi ilo-kalo ma ipâñga ñalae, ñana miki ma kasama Maro Kindeni kilala sondo kâ. ¹¹Maka kano pa Maro Ñjalae tu i tamwata ne walo ara ñalae tina ñinde ma ipu tini kaika pa ilomi kalomi, ñana miki ma kamandi kaika ku kakale malia rârâni tava ndekâña nâ. ¹²Maka iloma tu miki ma kawami ndaŋge pa kindi Tamânda. Ina kala muñga ivetami kapâñga tamâta ara, kala miki kakura tu kalaŋge vetâña arara rârâni i muñga ipatea tu ma iveta panzi ne tamâta, kinzi ñinde i uru ikai maro panzi kala simo lâ i ne sinâla ñalae ilo. ¹³Ñana tu muñga, kondoma ne walo ikai kindi kaika lâ. Andeta Maro Kindeni itikia kindi piti lâ, aku io kindi tamo kuku ñgu ñinde i Natu uru ikai maro papa. Maro Kindeni ilo ndo keno papa i Natu ñinde. ¹⁴Maro Kindeni Natuni ndaina iko kindi piti lâ kondoma ilo, aku izavaru nenda kiesaka rârâni piti marumbu lâ.

Paulo itula Kirisi kilala pwataki

¹⁵Kindi takura tu tamora Maro Kindeni nao lâ matânda, ande tia. Taitu i Natu itula Maro Kindeni kilala pwataki pa kindi tamora lâ. I Natu ñinde ikai maro pa kekelele rârâni ñinde Maro Kindeni muñga ipulianzi sipâñga. ¹⁶Nia ndoyo Maro Kindeni ipatea tu i Natu ñinde ma ipulianzi

kelekele rârâni lâ samba ilo wa tâno kulu wa. Ipulianzi kelekele rârâni kinda tamora lâ matânda wa kelekele rârâni takura tu tamora tia wa. Ipulianzi koroani kaika kie-kie ñinde uru simo sikai poe pa kelekele kie-kie. I tamwata muᅅgani ipulianzi kelekele rârâni, aku kelekele rârâni ñinde simo ᅅana sipanea i nâ. ¹⁷Nia ndoyo, lâ zo ñinde kelekele rârâni ᅅandai sipânga ᅅga, ande Kirisi imo muᅅgani lâ. Aku kelekele rârâni ñinde uru simo nianzi nianzi sondo lâ i kalo nâ. ¹⁸I tamwata nde imo kulu-kâmba panzi kalo-tawana tamâta ᅅgu ᅅgu, aku ᅅgu ñinde nde simo sitogo i kie-mbalau mwasina. Kinzi kalo-tawana tamâta ᅅgu nenzi via duvi kala i. I tamwata imuᅅga panzi tamâta rârâni ᅅana imandi lâ mateᅅa nianzi imo via kilo. Mine kala i tamwata imo kulu-kâmba pa kelekele rârâni.

¹⁹Maro Kindeni ipatea tu i tamwata ne via tava ne ilo-kalo wa kilala ndoni ma ipipi lâ Natu ñinde ilo. Mine kala Maro Kindeni tamwata imo ndo kuku i. ²⁰Aku Maro Kindeni ipatea tu ma ikai kelekele rârâni lâ samba ilo wa tâno kulu wa, aku ma ikainzi simâ simo taitu kuku i tamwata kilo. Mine kala io Yesu Kirisi ilâ pa kâi popole imâte ku ipaliᅅi see maliᅅi ndue. Maro Kindeni ne vetâᅅa ñinde iveta kelekele rârâni simo taitu kuku i kilo.

²¹Muᅅga miki kapu mulimi ndo pa Maro Kindeni. Miki nemi ilo-kalo nde ikai kazâᅅa papa i. Mine kala kiesaka nde ipipi ndo lâ ilomi kalomi, kala kaveta vetâᅅa sakamao kie-kie. ²²Andeta Kirisi ᅅga imâte lâ kâi popole tini lâ, aku ᅅana i ne vetâᅅa ara ñinde kâ, ande Maro Kindeni ivetami kamo ilomi kalomi taitu kuku i marumbu lâ. I ne vetâᅅa ñinde nde duvi mine; i ilo tu igona miki kamâ papa i tava ilomi mbâra-mbâra ndo, nemi soki toᅅge tia. Ambo miki ma kamo mine, ande tamâta toᅅge ma ikura tu isowe ᅅgua lâ tinimi ᅅana nemi vetâᅅa kâ, ande ma tia. ²³Mine nde ara ᅅana miki ma kasaᅅa nemi kalo-tawana ndindi nâ ku kamandi kaika. Tia ma vetâᅅa toᅅge imâ itogomi, aku ma kapile nemi mâsi ᅅana kao tinimi pa Maro Kindeni tu ma iveta vetâᅅa arara pami. Pâri ara nde itula vetâᅅa arara ñinde pwataki pa miki kaloᅅo lâ. Naᅅa Paulo, naᅅani amo wurâta tamâta ᅅana pâri ara ñinde kâ, aku maka tamâta pinde uru katula pâri ara ndainani nâ panzi tamâta rârâni simo tâno kulu.

Paulo uru ivilanzi Kolosi ᅅgu

²⁴Kala ᅅine naᅅa andeka nâ ᅅana nâna ñinde muᅅga akai ᅅana avila miki kâ. Kinda nde tamâta ᅅana takai nâna mine kâ, aku nâna ñinde ᅅandai marumbu ᅅga. Kala ᅅine naᅅa akai nâna lâ warakâᅅgu karaeᅅgu tini, itogo Kirisi muᅅga ikai nâna ᅅana ivilanzi kalo-tawana tamâta, kinzi ñinde simo sitogo i kie-mbalau mine. Aku nâna ma ikeno mine lee, ikura lâ zo ndia nâna mine ma marumbu ndo lâ. ²⁵Maro Kindeni

tamwata muṅgani ipatea naṅa tu ma amo i ne ṅgu nenzi wurâta tamâta ṅana avila miki kâ. Aku ipatea wurâta pana tu ma aporo atula i kawa ṅgua ndoni. ²⁶Muṅgani, lâ nia ndoyo, aku imâ lee ipâṅga lâ zo ṅine, ande Maro Kindeni kawa ṅgua ṅinde ikeno paveâṅa nâ, kala tamâta rârâni nde sizizâla ndo ṅana. Aṅga lâ zo ṅine ṅgua ṅinde ipâṅga nia yo panzi Maro Kindeni ne tamâta. ²⁷Maro Kindeni muṅgani ipatea tu ma itula ṅgua paveâṅa ṅinde ipâṅga nia yo pa i ne tamâta kinda. I kawa ṅgua ṅinde nde ara ku ara ndo, aku ṅgua ṅinde nde ṅana ivilanzi tamâta ṅgu rârâni simo tâno ndoni. ṅgua paveâṅa ṅinde nde mine; Kirisi imo miki ilomi. Mine kala miki uru kao tinimi ṅana zo muli ṅinde miki ma kamo ara ndo kuku i lâ samba lawea.

²⁸Mine nde maka uru katula Kirisi parina panzi tamâta rârâni taitu-taitu. Maka iloma tu tamâta rârâni ma sipaipa ndo kuku Kirisi, aku iloma tu nenzi ilo-kalo ma ipâṅga ṅalae ndo. Mine kala maka uru kaporo ṅgua kaika panzi kapanananzi sondo. ²⁹Naṅa uru amandi kaika ku amakâsa ṅalae tina ṅana aveta wurâta ṅinde kâ. Kirisi walo kaika ilua naṅa ṅana aveta mine, aku i ne walo ṅinde uru ipâṅga nia yo lâ nanenṅu wurâta tini.

**Kinda ma kalonda tawana kaika ku tapu mulinda
pa kinzi lajeṅa tamwatanzi nenzi ṅgua**

2 ¹Naṅa ilonṅu tu miki ma kasama mine; naṅa uru amakâsa ṅalae ṅinde ṅana avila miki kâ. Aku naṅa uru amakâsa mine nâ ṅana avilanzi kalo-tawana tamâta simo Laodisia lawea tona, sitavanzi tamâta pinde naṅa ṅandai ataṅo mbaunzi ṅga. ²Nanenṅu wurâta ṅine nde duvi mine; naṅa ilonṅu tu apu tini kaika pa miki rârâni ilomi kalomi, aku ilonṅu tu apaṅomi ṅana kamo ilomi kalomi taitu ku kao ilomi ndo ilâ panzi Maro Kindeni ne tamâta rârâni. Ambo miki ma kamo mine, ande nemi ilo-kalo ma ipâṅga sondo, aku ṅinde ma ara ndo. ṅinṅga miki ma kasama Maro Kindeni ne ṅgua paveâṅa ṅinde duvi sondo. Kirisi tamwata nde ṅgua paveâṅa ṅinde kanaṅo. ³Maro Kindeni ne ilo-kalo kie-kie rârâni nde itogo kelekele ara ndo, ne kulu ṅalae tina. Aku Kirisi simbo nâ ikatona ilo-kalo ndoni ṅinde ikeno i tamwata ilo.

⁴Naṅa tiningu pwâka tu tamâta tonṅe ma imâ iporo ṅgua mona-mona pa miki ṅana ilaṅemi kâ. Mine kala aporo ṅgua kaṅa mine pami lâ. ⁵Lâ zo ṅine naṅa amo kumi tia, taitu naṅa uru kalonṅu ṅgere ṅanami ikura zo zo, aku ṅinde itogo naṅa warakâṅgu amo kumi. Aku naṅa andeka nâ, ṅana tu miki kamo ilomi kalomi taitu ku kamandi kaika, aku nemi kalo-tawana ikeno sondo ndo pa Kirisi.

Kinda ma tapasipa lâ taitu kuku Kirisi ku takai via mao

⁶Miki kalomi tawana tu Yesu Kirisi nde Maro ṅalae. Mine nde ara ṅana miki ma kapasipa lâ taitu kuku i nâ, itogo kala ṅine miki kamo

mine. ⁷Miki ma kapaipa kuku i, itogo kâi io mburu-mburu indue ilâ tâno ilo. Aku miki ma kasâu pa Yesu Kirisi tu isukami, itogo sâmbwe isuka luma kâki mine. Ara ŋana nemi kalo-tawana ma ipâŋga kaika ndo, itogo muŋga sipananami mine. Aku ara ŋana miki ma kaporo ndaŋge ŋalae ilâ pa Maro Kindeni nâ ikura zo zo.

⁸Miki kapakatona sondu ŋga. Tia ma tamâta tonŋe itula tâno tamâta nenzi ilo-kalo laŋeŋa kaŋa-kaŋa pami, aku ŋgua kaa ŋinde ma isae ilomi kalomi ne nzâla giri lâ. Ilo-kalo kie mine ŋandai iyoka pa Kirisi imâ pa kinda ŋga. Kinzi tamâta sikai ilo-kalo kaa mine lâ timbunzi wa tâno ŋine ne ŋgua kaa kaa wa.

⁹Miki kasama tu Kirisi nde ipâŋga tamâta itogo kinda mine, andeta Maro Kindeni ne via wa kilala ndoni nde imo ndo kuku i. ¹⁰Kirisi nde imo kulu-kâmba panzi koroani kaika rârâni, kinzi ŋinde uru sikai poe pa kekelele kie-kie. Miki kapaipa kuku Kirisi lâ. Mine kala Maro Kindeni via mao ilami marumbu lâ, aku via ŋinde nde ipipi ndo lâ ilomi. ¹¹Miki kapaipa kuku i lâ, aku ŋinde itogo miki kakai karae-veŋa ne mâsi tonŋe. Taitu mâsi ŋinde ŋandai iregege kuku tamâta nenzi mâsi ŋana sive karaenzi kâ. Kirisi iveta mâsi ŋinde ipâŋga kanaŋo lâ ilomi kalomi. Muŋga, lâ zo ŋinde miki kapaveta kuku mâsi mao ŋinde, ande Kirisi iyautemi piti lâ ilo-kalo siŋga ne vetâŋa potomule. ¹²Muŋga Maro Kindeni ne walo kaika ipaŋo Kirisi lâ mateŋa nianzi imo via kilo. Aku miki kapaipa kuku Kirisi lâ. Mine kala lâ zo ŋinde miki kalili pâri ara ne lââ, ande ŋinde itogo Maro Kindeni ikea miki lâ kuru ilo kuku Kirisi, ŋineŋga ipaŋomi kamo viami kilo kuku i.

¹³Muŋga miki kaveta kiesaka kie-kie, aku kapono muli pa ilo-kalo siŋga nâ. Lâ zo ŋinde, miki kamo katogonzi mateŋa tamâta mine, aku miki kamo piti ndo ŋana Maro Kindeni ne ŋgua pâŋa kâ. Andeta kala ŋine Maro Kindeni via mao ilua kinda lâ, itogo via ŋinde muŋga ilua Kirisi mine, aku izavaru nenda kiesaka rârâni piti lâ tininda. ¹⁴Nanayoni Mose ne ŋgua tukuŋa itula nenda vetâŋa soki rârâni ipâŋga nia yo, aku tukuŋa ŋinde ikai kazâŋa pa kinda lâ ŋgua nia. Andeta Maro Kindeni ikai ŋgua tukuŋa ŋinde ne walo ndoni piti lâ, aku isona itâra lâ Kirisi ne kâi popole tini. ¹⁵Kirisi ne mateŋa lâ kâi popole tini izavaru koroani kaika nenzi walo ndo lâ, kinzi koroani ŋinde uru sikai poe pa kekelele kie-kie. Kirisi ne mateŋa ŋinde itula pwataki panzi tamâta rârâni tu i ipolenzi koroani ŋinde rârâni marumbu lâ, aku ivetanzi sipâŋga togo kekelele kaa nâ lâ tamâta rârâni naonzi.

Ŋgua tukuŋa ne vetâŋa kie-kie ikura tu ivila kinda, nde tia

¹⁶Mine nde miki ma ilomi ŋalae koŋa ŋana tamâta nenzi ŋgua tukuŋa kiri-kiri ŋana kâŋa-nuŋa wa kumbwa kie-kie wa nzimona wasaseki wa pwareâŋa ne zo sapâŋa wa, mine ndimo. ¹⁷Ŋgua tukuŋa ne vetâŋa ŋinde

rârâni nde itogo uŋa kaa nâ, aŋga vetâŋa mao nde ipâŋga muli. Kirisi nde vetâŋa mao warika.

¹⁸Tamâta pinde uru sitapâri ŋalae koŋa ŋana mâsi pinde simora lâ nenzi mbupuleŋa. Kinzi tamâta mine sipono muli pa tamâta nâ nenzi ilo-kalo kaa nâ, kala sipasuka warakanzi tininzi koa tia nâ. Kinzi sindeka ŋana silâŋe tu kinzi sipatawa warakanzi tininzi, aku sindeka ŋana sipaneanzi aŋelo tona. Miki ma kapaloroŋo pa nenzi ŋgua laŋeŋa ŋinde ndimo. Tia ma muli Maro Kindeni ma tini pwâka tu kulu ara tonŋe ilami. ¹⁹Tamâta ŋinde nde sipatâpa warakanzi piti ndo ŋana Kirisi kâ, ina kala imo kulu-kâmba pa kinda kalo-tawana tamâta ŋgu. I uru ikai poe pa ne ŋgu kinda, aku i simbo nâ uru ivila nenda kalo-tawana ŋana itumbu ŋalaŋala, ikura Maro Kindeni ipatea pa kinda mine.

²⁰Miki kapaipa kuku Kirisi lâ, aku ŋinde itogo miki kamâte kuku i. Mine kala tâno ŋine ne ŋgua kaa kaa ikura tu ikai poe pami kilo, ande tia. Mine nde ŋana sâ kâ ŋga miki kamo katogonzi tâno ŋine ne tamâta, a? Ŋana sâ kâ ŋga miki kapono muli pa tâno tamâta nenzi ŋgua tukuŋa kiri-kiri, a? ²¹Kinzi nenzi ŋgua tukuŋa ŋinde nde kie mine: “Noko ma kusaŋa ŋinde ndimo”; “Noko ma kuka ŋinde ndimo”; “Noko ma kutaŋo ŋinde ndimo”. ²²Taitu tukuŋa kie mine nde ŋana kelekele kaa nâ kinda takai, ŋineŋga marumbu walele nâ. Kinzi tamâta nâ situla ŋgua tukuŋa mine ku sipanana kinda tu taponon muli papa. ²³Mao nâ, tamâta pinde ilonzi patepa tu tukuŋa mine iregege kuku ilo-kalo ara, ŋana tu tukuŋa ŋinde itula vetâŋa ŋana tapaneanzi aŋelo wa tapatawa warakânda tininda wa taveta nâna pa warakânda karaenda wa. Andeta vetâŋa kie mine ikura tu ivila kinda ŋana tapu mulinda pa ilo-kalo siŋga ne vetâŋa potomule kâ, ande tia.

Kinda takai via wasaseki kuku Kirisi

3 ¹Muŋga, lâ zo ŋinde Maro Kindeni ipaŋo Kirisi lâ mateŋa nianzi imo via kilo, ande miki kala kakai via wasaseki tona. Mine nde ara ŋana miki ma ilomi pa samba ne kelekele nâ. Lâ samba lawea, ande Kirisi isaŋona imo pa Maro Kindeni tini pa wia kâ. ²Ara ŋana miki ma kalomi ŋgere ŋana samba ne kelekele nâ ikura zo zo. Miki ma kalomi ŋgere ŋana tâno ne kelekele ndimo. ³Ŋana tu itogo miki nemi ilo-kalo siŋga nde imâte lâ, aku miki kapasipa lâ taitu kuku Maro Kindeni lâ. Mine kala Maro Kindeni ikatona nemi via mao pami lâ nia ŋinde Kirisi imo. ⁴Kirisi nde nemi via mao ŋinde warika. Aku lâ zo ŋana i ma itaulo imâ ipâŋga nia yo, ande miki ma kamo kuku i, aku tamâta rârâni ma simora i kilala pwataki tu i imo Maro Ŋalae.

Kinda tapâŋga tamâta wasaseki lâ

⁵Mine nde ara ŋana miki ma kapu mulimi ndo pa tâno ŋine ne ilo-kalo rârâni. Ilo-kalo ŋinde uru igagatimi ŋana kapalulua tinimi potomule

wa, kapaveta kuku vetâŋa muso kie-kie wa, ilomi yosi pa tinimi pinde nenzi kelekele wa. Lâ Maro Kindeni nao, ande mâsi ŋana ilomi yosi pa tinimi pinde nenzi kelekele kâ ande irerege kuku mâsi sakamao ŋana kawâŋgi kapaneanzi maro laŋeŋa kâ. ⁶Ŋana vetâŋa kie mine kâ, ande Maro Kindeni ne wisi-nâna ma imâ panzi tamâta ŋinde uru taŋanzi kaika pa i ne ŋgua. ⁷Aku muŋga miki warakami kala kapono muli pa ilo-kalo potomule ŋinde mine nâ, kala kapaveta kuku vetâŋa ŋinde rârâni. ⁸Aŋga lâ zo ŋine, ande miki ma kapile vetâŋa potomule kie-kie mine; mâsi ŋana wisi-nâna kâ, aŋga mâsi ŋana pawaya kâ, aŋga mâsi ŋana ilomi kâki ŋana kaveta malia panzi tinimi pinde kâ, aŋga mâsi ŋana kaporo ŋgua soki ŋananzi tinimi pinde kâ, aŋga mâsi ŋana kaporo ŋgua sakamao-sakamao kâ. ⁹⁻¹⁰Miki muŋga kasoki ilo-kalo singa tava ne mâsi rârâni piti lâ, aku kapâŋga tamâta wasaseki marumbu lâ. Mine kala miki ma kaporo ŋgua laŋeŋa panzi nimi-nambwe kalo-tawana tamâta ndimo. Maro Kindeni ipuliami kapâŋga tamâta wasaseki lâ, aku i ilo tu miki ma kasama i kilala sondo ndo. Mine kala ikura zo rârâni i uru iveta wurâta lâ ilomi kalomi, ŋana miki ma kapâŋga kamo togo i tamwata imo mine. ¹¹Kinda tapâŋga tamâta wasaseki lâ. Mine nde kinda rârâni tamo rege-rege nâ. Kinzi tamâta lâ tinikoa ŋgu nde rege-rege kunzi tamâta lâ Juda ŋgu. Aŋga tamâta ŋinde muŋga sikai karae-veŋa ne mâsi lâ tininzi nde rege-rege kunzi tamâta ŋinde ŋandai sikai mâsi ŋinde lâ tininzi. Aŋga tamâta ŋinde simo lâ tâno malawae, nenzi ŋgua wa vetâŋa piti-piti, sitavanzi tamâta uru siveta wurâta koa tia nâ panzi tamâta pinde wa tamâta uru sikai mbumbu lâ nenzi wurâta tini wa, ande kinzi ŋinde rârâni nde rege-rege nâ, ŋana tu Kirisi simbo nâ nde ŋalae, aku i tamwata imo ne tamâta kinda rârâni taitu-taitu ilonda.

Kinda ma tao ilonda ndo ilâ panzi tininda pinde

¹²Maro Kindeni ipatea miki tu ma kamo i tamwata ne ŋgu, aku i ilo ndo keno pami. Mine nde ara ŋana miki ma kapaveta kuku vetâŋa arara mine: miki ma kalomi sukâŋa panzi tinimi pinde; miki ma kaveta kemi ara nâ panzi; miki ma kapatawa warakami tinimi; miki ma kamo mwasa nâ kunzi tinimi pinde; aku miki ma wisimi nâna walele panzi ndimo. ¹³Ambo noko ninambwe kalo-tawana tamâta tonje ma italea noko ŋana vetâŋa tonje muŋga kuveta, ande noko ma wisi nâna papa i ndimo. Ara ŋana miki taitu-taitu ma kazavaru nimi-nambwe nenzi vetâŋa soki rârâni piti lâ. Maro Ŋalae izavaru miki rârâni nemi kiesaka piti lâ; mine nde miki kala ma kazavaru tinimi pinde nenzi vetâŋa soki piti lâ tininzi mine nâ. ¹⁴Aku ara ŋana miki ma kaseŋge vetâŋa taitu ŋine ilâ kunzi vetâŋa arara ŋinde; miki ma ilomi ndo panzi tinimi pinde. Vetâŋa ŋine nde ipolenzi vetâŋa arara rârâni, aku iveta miki kamo ilomi kalomi taitu, ikura Maro Kindeni ne pateâŋa mine.

¹⁵Maro Kindeni ipatea tu miki ma kamo see ŋgu taitu, aku i ilo tu Kirisi ne wisi-pisi ma imo ŋginimi. Mine kala ara ŋana miki ma kasâu pa i ne wisi-pisi ŋinde tu ikai poe pami. Aku ara ŋana miki ma kawami ndaŋge papa i tona. ¹⁶Lâ zo ndia miki ma kakai ilo-kalo ara ku kapanananzi nimi-nambwe kalo-tawana tamâta wa katunzi sondu wa, ande lâ zoni ndaina miki ma kapasakana Kirisi ne ŋgua ara rârâni ikeno kaika lâ ilomi kalomi. Aku lâ zo ndia miki kawâŋgi wâŋgiŋa paneâŋa kâ wa ndekâŋa ne wâŋgiŋa wa wâŋgiŋa pinde Koroani Sapâŋa itula ipâŋga lâ ilomi kalomi wa, ande ara ŋana miki ma kapasakana Kirisi ne ŋgua ŋinde kaika ku kawâŋgi tava kawami ndaŋge pa Maro Kindeni. ¹⁷Aku nemi ŋgua poroŋa ndia wa vetâŋa ndia miki kaveta wa, ande miki ma kaveta ŋinde rârâni lâ Maro Ũjalae Yesu ŋa. Aku Yesu ma isukami ŋana kawami ndaŋge pa Tamânda Maro Kindeni.

Paulo iporo ŋgua panzi tamâta simo see taitu

¹⁸Miki taine ma kaveta ikura kaiwami tamâne kawanzi ŋgua mine. Mâsi ŋinde nde sondu ndo lâ Maro Ũjalae nao. ¹⁹Ũŋga miki tamâne ma tinimi mwasa nâ panzi kaiwami taine. Miki ma kambitanzi ku kaleleanzi ŋjalae koŋa ndimo. ²⁰Ũŋga miki lâlu, miki ma kaponu muli pa tinami-tamami nenzi ŋgua ikura zo rârâni. Maro Ũjalae ilo ara ndo ŋana vetâŋa mine. ²¹Ũŋga miki lâlu ŋinde tamanzi, miki ma kaveta natumi ŋinde wisinzi nâna ndimo. Ambo miki ma kaveta mine panzi, ande kinzi ma simo tava ilonzi malia nâ.

Paulo iporo ŋgua panzi tamâta uru siveta wurâta koa tia nâ, sitavanzi tamâta ŋinde nenzi tamâta ŋalaŋala

²²Miki tamâta ea uru kaveta wurâta koa tia nâ panzi tamâta ŋalaŋala, miki ma kaponu muli pa nenzi ŋgua rârâni. Miki ma kaveta mine lâ zo ndia kinzi simo laiti silea pami, aku lâ zo ndia simo malawae tona. Miki ilomi tu kinzi ma sindeka ŋana nemi wurâta kâ, aku ŋinde nde ara. Andeta miki kamege ŋana Maro Ũjalae, aku ŋana duvi ŋinde kâ miki ma kalomi ŋgere sondu ku kaveta nemi wurâta rârâni ara nâ. ²³Wurâta ndia miki kaveta, ande miki ma kamandi kaika ku kaveta wurâta ŋinde sondu ndo. Ara ŋana miki ma ilomi mine; “Naŋa aveta wurâta ŋine panzi tamâta nâ, ande tia. Naŋa aveta wurâta ŋine papa Maro Ũjalae tona.” ²⁴Miki kalomi ŋgere sondu ŋana ŋine kâ; Maro Ũjalae nde ipatea vetâŋa arara pinde ŋana iveta panzi ne tamâta, aku muli i ma iveta vetâŋani ndaina pami, itogo nemi wurâta ne kulu mine. Kirisi ina nemi koipu mao, aku wurâta ndia miki kaveta, ande miki kaveta papa i. ²⁵Ũjana tu tamâta ea kinzi siveta vetâŋa potomule, ande kinzi ma muli sikai pareŋa-nia ŋana nenzi vetâŋa soki ŋinde kâ. Maro Kindeni iveta vetâŋa kie taituni panzi tamâta rârâni.

4 ¹ An̄ga miki tamâta ŋalaŋala, miki ŋinde kala kamo koipu panzi wurâta tamâta pinde, ande miki ma kaveta kemi ara ku sondo nâ panzi. Miki kalomi ŋgere sondo ŋana ŋine kâ; miki warakami nemi koipu kala imo samba lawea.

Kinda ma tapakatona warakânda nenda vetâŋa ku takai noŋa sondo

² Miki ma kakai wulitia ŋana kano pa Maro Kindeni kâ ndimo. Aku lâ zo ndia miki kakai noŋa, ande miki ma kalomi ŋgere sondo ku kawami ndaŋge papa i. ³ Aku ara ŋana miki ma kakai noŋa pa Maro Kindeni tu ma ivila maka tona, ku ma ikai nzâla piti pama ŋana katula i kawa ŋgua ŋana Kiriŋi kâ. Ŋgua ŋinde muŋga ikeno paveâŋa nâ, kala ŋine ipâŋga nia yo. Kinzi sipa wâlo kaika lâ tiningu ku sio naŋa amo luma sakamao ilo ŋana nanen̄gu wurâta ŋinde kâ. ⁴ Aku ara ŋana miki ma kano pa Maro Kindeni tu ma ivila naŋa ŋana atula ŋgua ŋinde sondo ipâŋga nia yo, ikura i ne pateâŋa mine. ⁵ Tamâta pinde ŋandai kalonzi tawana Yesu Kiriŋi ŋga. Lâ zo ndia miki kamo kunzi tamâta mine, ande miki ma kapakatona sondo ŋana nemi vetâŋa kâ. Ambo miki ma kaluku ŋana katula pâri ara panzi tamâta ŋinde ikura zo rârâni, ande ŋinde ma ara. ⁶ Aku lâ zo ndia miki kaporo ŋgua panzi, ande miki ma kaporo ŋgua ara nâ. Ambo miki ma kaveta mine, ande kinzi ma ilonzi ara ŋana siloŋo nemi ŋgua kâ. Ambo tamâta ton̄ge ma ikason̄ami ŋana ŋgua pinde, ande miki ma kaporo ŋgua sondo nâ taulo papa.

Paulo isupwanzi Tikikus ku Onesimus rua silâ pa Kolosi lawea

⁷ Tikikus ma imâ itapâri pami ŋana vetâŋa rârâni ipâŋga pa naŋa lâ. Tikikus nde ninda-nambwe, aku maka iloma ara nâ papa i. I uru iveta wurâta pa Maro Ŋalae, itogo maka mine, aku ne wurâta ŋinde nde ipâŋga ara ndo. ⁸ Mine kala naŋa asupwa i imâ pami, ŋana miki ma kasama ŋana maka nema saŋonâŋa wa moŋa wa. Naŋa ilon̄gu tu i ne ŋgua ŋinde ma ipu tini kaika pa ilomi kalomi. ⁹ Aku naŋa asupwa nawalami Onesimus kala imâ kuku Tikikus. Onesimus nde ninda-nambwe, aku i uru iveta ne wurâta rârâni sondo nâ. Kinzi rua ma sitapâri pami ŋana vetâŋa rârâni kala ŋine ipâŋga lâ nia ŋine.

Paulo iporo wisi ara ne ŋgua ilâ panzi Kolosi ŋgu

¹⁰ Aristarkus imo kuku naŋa lâ luma sakamao ilo, aku i kawa kari ara pami. An̄ga Malaka, ina Banabas tai, ande i kala mine nâ kawa kari ara pami. Ambo Malaka ma imâ pami, ande ara ŋana miki ma kandeka nâ ku kakai imâ imo kumi, ikura ŋgua ŋinde muŋga sipananami mine. ¹¹ An̄ga Jisas, i ŋa ton̄ge Jastus, ande i kala kawa kari ara pami. Lâ Juda ŋgu, ande tamâta ŋato ŋinde simbonzi nâ uru siveta wurâta kuku naŋa ŋana kakainzi tamâta simâ Maro Kindeni ne ŋgumbi ilo. Aku kinzi uru

sivila naŋa sondo nâ. ¹²Aŋga Epafras kala kawa kari ara pami tona. I nde miki nawalami tonŋe, aku imo Yesu Kirisi ne wurâta tamâta. Ikura zo rârâni, ande i uru ikai noŋa kaika pa Maro Kindeni tu i ma isukami, ŋana miki ma kamandi kaika ku kapono muli sondo pa vetâŋa rârâni Maro Kindeni ipatea pami ŋinde, itogo kalo-tawana tamâta mao uru siveta mine. ¹³Naŋa warakâŋgu asama kala aporo pwataki tu Epafras uru imakâsa ŋalae tina ŋana ivila miki tavanzi kalo-tawana tamâta simo Laodisia lawea wa Hierapolis lawea wa. ¹⁴Aŋga Luka, ina tamâta ŋana ivetanzi pukonŋa kâ ŋinde maka tinima mwasa ndo papa, ande kinzi rua Demas rua kala kawanzi kari ara pami. ¹⁵Naŋa iloŋgu tu miki ma kaporo kawama kari ara panzi ninda-nambwe kalo-tawana tamâta simo Laodisia lawea, aku imâ pa Nimfa tavanzi kalo-tawana tamâta uru sipasau lâ i ne luma ŋinde tona.

¹⁶Naŋa iloŋgu tu miki ma kapono pepa ŋine marumbu lâ ŋga, ŋineŋga kao ilâ panzi kalo-tawana tamâta ŋgu simo Laodisia lawea, ŋana kinzi kala ma sipono tona. Aku pepa ŋinde naŋa muŋga ao ilâ panzi kalo-tawana tamâta simo Laodisia lawea, ande naŋa iloŋgu tu kinzi ma sio pepa ŋinde imâ pami ŋana miki ma kapono tona.

¹⁷Aku miki ma kaporo ŋgua mine pa Arkipus; “Noko ma kupakatona sondo, aku wurâta ŋinde muŋga silano ŋana kuveta pa Maro ŋalae kâ, ande noko ma kuveta wurâta ŋinde sondo lee ikura wurâta ŋinde ma marumbu ndo lâ.”

¹⁸Naŋa Paulo, naŋa warakâŋgu mbaunŋu aŋgere kari ara ne ŋgua ŋine imâ pami. Naŋa iloŋgu tu miki ma kalomi ŋgere ŋana naŋa kâ, ŋana tu naŋa amo luma sakamao ilo amo ŋai yo. Maro Kindeni ne wisi-wisi imo kumi.